



Blaggedde-Värs 2026

Blyyb verspiilt

Botzdonner, hoppla, also guet
Do het jetz öbber aber Muet
Eso aini - herrjeeminee
Het Basel glaub no gar nie gsee
Schlicht und klar wies aim grad dunggt
Bringt si dr Kärn grad uff dr Punggt
Es goot um d Zuekunft – um die Glaine
Jä s Comité mecht dorum maine
Me soll jetz mol die Junge eere
Und d Blaggedde soll iine gheere
Mit iine sinn au die verbunde
Wo jäärlich als zig-dausig Stunde
Sich fir dr Noowuggs fescht yysetze
Me ka das gar nit gnueg hoch schetze.

Dä Binggis doo symbolisiert
Dr Noowuggs und transportiert
Die Lyychtigkait und au die Fraid
Dr Witz und schliesslig d Haiterkait
Wies nur bi Kinder so ka gää
Mir kenne si als Vorbild nää.

Bim Kinschtler, wo sich Orlando nennt
Isch s innre Kind au duurebrennt
Won är d Blaggedde het kreiert
Und mit däm Binggis raffiniert
Dr Uffruef an ys alli macht
Gännt Vollgas, und zwor dass es gracht
Dient lache, spiilen, ummerenne
Wies aigentlig nur Kinder kenne
Hauets uff d Gass und löönt ain uuse
Kasch s Joor duure no gnueg lang pfluuse
S het numme d Fasnacht die Magie
Drum löönt ys alli Kinder sy
Blyyb verspiilt als glaine Gnopf
Das drifft dr Nagel uff dr Kopf.

Vyyl Spass iir Kinder, juhui juhee
Wünscht **sFasnachts-Comité**